

Sujet: Viva Berluccorruptioni

Dove vai.... bella Italia ?

Das Land kennt's doch vyyl besser ha,
statt *Chianti* und *insalati misti*
herrsche derte jetze *i Fascisti*
statt *dolce far' niente* und *speranza*
lyt das scheen Land schwäär uff em Ranza.
Dert isch laider e Deschpoot am Rueder,
e ganz e myyse, fyysse Brueder,
wo Dank em Link zur Mafia
sich jeede Drigg erlaube ka.
Denn *il Primo Ministro Berlusconi*
isch schlicht und aifach e *ladroni*.
Kuum etabliert är sich als *avvocato*
sicheret är sich scho sy erschts *da capo*
und mit em Sääge vom Cardinale Siri
baut är z Mailand Hyyser, bsunders dyyri
und verschacheret die, do kennt äär nyt,
nadyrlig styryfrey, mit Profit.
Das erschti Gäld nutzt äär zem schmiire
und effnet sich dermit e mäangi Diire
so wird är Mitgליid vo der Loge *Propaganda Due*
und scho ischs dert verby mit sanfter Ruhe.
Dr Silvio spinnt in däm Club syyni Fääde
und e mänge blybbt im Netz drinn gläabe
und wird eso im Berlusconi heerig
dä nutzt dä Nutze und garniert gheerig.
Dr Berlusconi kauft druffaabe gly
zerscht d Präss und denne s Färnsee yy
und manipuliert eso z Italie d Masse
will das zue syne Blään duet passe.
Druffaabe macht är sich mit Hilf vom Craxi
in kurzer Zyt zum *Primus Maxi*
und sträbbt als Chef vo dr *Forza Italia*
ganz gly scho d Macht im Staate aa.
Gschwind schliesst är mit dr *Lega Nord*
e Päggli, zaalt d Mafia fir e Mord,
und wird Dangg mängem fyysse Drigg
zum Boss vo dääre Schmiirgäld-Republigg.
So fiehrt dä honorabli *Cavaliere*
das stolzi Land grad in d Misère,
är fiehrt sich uff wie dr Kaiser z Room
und isch doch aigedig e schlächte Pausegloon.
Sy Vorbild isch dr groossi *Duce*
Fir iin isch dä e straalends *luce*.
Cosi a fatto il grande Benito,
sayt dr Silvio, drum mach ych's dito!
Am liebschte wurd är schwarzi Hemmli draage
und mit erhoobener Fuscht *buongiorno* saage!
Und gits e Gsetz wo im nid passt,
wärde unbequäämi Geegner gschasst
und schreyt d Opposition au luut *aiuto*,
dr Berlusconi dä blybbt *brutto*!
E jeedes Gsetz wird so umgange
as kaine kaa dä Brueder fange
und stellt e Richter unagnäämi Frooge,
so wird ganz aifach gschmiirt und glooge.
E Hampfle Euro zer rächte Zyt
und scho nutzt au s strängschti Gsetz gar nyt.
Fir dr Berlusconi sin Richter gaischtig grangg

doch au die leen sich schmiire, Gott sei Dangg,
denn das Metier beherrscht äär glat am beschte
nadyrlig nie uff aigni Keschte.
Doch nääbe all dämm Glanz und Gloria
mecht dr Silvio ständig noomee ha
und will är sich sunscht nyt gunne duet
nimmt er zwai-drey Neetli uus em Huet
und macht dr AC Milan sich als Gschänggli
dert sitzt är stolz jetz uff em Presidäntebänggli.
Die Gyyr no Macht macht iin besässe
är mecht alles in sich yne frässe
und dorum kunnts im beschtens glääge
wo n är gsäägnet mit em EU Sääge
fir e halb Joor zum *Primus inter Pares* wird
und so an d Spitze vo Europa schwiirt.
Dert als Preesi uff em EU-Droon
speyt äär uff alli Spott und Hoon:
bezeichnet dytschi Tuuris uus em Norde
als diggy, fuuli, Dringgerhorde
und maint as unter em Mussolini
e Gfängnis wiene Hotel schyyni.
Und wo in Strossburg aine oponiert
wird dä verbal ins KZ abserviert.
Do lipfts e mängem graad dr Huet
me froggt sich mit Rächt vor luter Wuet,
chi sono questi maledetti,
mit waiche Hirni wie Spaghetti,
wo in Europa an de Schalter sitze
und soone Pfluume dulde an dr Spitze?
Was sind das fiir lääri Grappa-Fläsche,
wo's hool Händli mache und die aige Däsche
fille dien und dr Profit garniere
und sich kai Momänt au nur scheniere?
Do schwindet d Achtig vor Europa
E jeede Staatsmaa wird zem senyyle Opa.
Als Fiidlebirger hauts dy umm,
dänggsch konschterniert, bin ych denn dumm?
Ych gang go schaffe, verstyrr e jede Frangge
und dä hordet s Schwarzgäld uff de Schwyzerbangge!
Ab sovyyl mafiöse *corruzioni*
verliersch glatt die letschte *illusioni*
und gseesch *la tricolore dell' Italia*
saysch numme: *porca miseria!*